


縵雅堂駢體文

一



文體駢堂雅縵

(一)

著壽詒王

序

同治五年馬端敏公撫浙以舊籍散佚。荆設書局。羅名雋士實其中。時余客端敏幕。與孫丈琴西、高丈伯平、實贊成之。山陰王廣文眉叔最後來與校讎之事。久遂與余識。後局移戴園。居益近。過從益數。而局中諸君或以科第去。或得官去。不則載筆劄游四方以去。獨眉叔貧老守局中。且善病。余閱其寂寂也。思有以慰之。恆招之至。至則爲余商榷文字。有疵累必言。言無不盡。己卯榜後。眉叔益不自聊。余謂眉叔曰。君老矣。復何欲。眉叔蹙然曰。余何欲也。大功盛名。吾欲之不及。妮妮富若貴。吾不敢欲。欲亦未必能得。獨生平仰屋捫腹。噴心血。積紙盈尺。脫不覆瓿。後世知有誰某姓名。此不能無欲者。余爲之懼然。以悲。眉叔所爲詩古文詞甚夥。既自刊筌月詞。余乃取其駢儷文若干卷。屬自點定。謀同人集貲刊之。眉叔感余意。退而泣下者數四。蓋庚辰冬閒事也。臘垂盡。眉叔將以歲事歸。手其文來付余。且言別。余謂春閒當成書報君。既度歲。以文授工。工未半而眉叔之訃至矣。嗟乎。士窮困抑塞。束手不任天下事。至其老也。僅僅出其餘。作爲文詞。欲自附於傳人之後。而卑賤無貴顯交。其所著述。率不過一人一家之言。於世無大關繫。雖傳亦不能遠。而天或且靳之。如眉叔之文。幾幾可傳矣。顧仍不及見其書之成。又若或以此而促其年者。其亦可哀也夫。訃之至也。余既爲位哭之。因促梓人速其成。猶懼中止。而或厄其傳也。若夫余之不文。烏足以知眉叔之文也。顧斷斷焉爲之序者。仍眉叔之志。不敢負死友之屬也。光緒辛巳閏七月仁和許增。

祭文

光緒七年十一月日。陽湖汪學瀚、平湖徐惟錕、仁和許增、許郊、潘鴻、張大昌、陳霖、錢唐漢子潼、謹以香醪一甌、溪簌盈掬、龍涎之炷、雪谷之冰、致祭於

眉叔先生之靈。嗚呼！鶴歸丁令，盼落月兮來無；鵬賦賈生，傷流風兮已盡。電光泡影，頃成宿草之悲；雋語清詞，遽醒生花之夢。竊以苔岑跂舊，蘭契思今。珠樹仙才，玉臺詩格。倚聲鏤月，勝柳七之歌詞；走筆鍾霞，具蘇髯之興會。記拔劍而斫地，親覘奇氣激昂；擬援琴而登牀，終歎遺音閨寂。莫禳龍蛇之歲，祇餘麟鳳之聲華。風燭一朝，雲煙萬古。玉樓何處，擬通芳柬而無從；瑤情有知，爲酌桂醕而尙饗。往時小海吟興如存，今日大招靈談定接。歌以當哭，爰進蕪辭。來些讀騷，藉抒藹悃。辭曰：

稽山兮峯青，湘湖兮波渟。君之居兮寒煙局，揚素旄兮駕翠輅。乘風來兮歆余馨，薦梓孟兮酌醪醑。望顏色兮雲杳冥，幽顯隔兮如有靈。佩珊珊兮臨吾庭，欲見而終不得見兮。慕馨歆以傾聽，願君醉此觴兮。鑒故人之微誠。

縵雅堂駢體文目錄

卷一

恭擬皇上龍飛親政頌

獨石軒遺集序

秋言自序

亦廬詩序

文學鄺君墓誌銘

擬駱右丞蕩子從軍賦

趙壹論

讀葛壯節公年譜書後

仕女冊題詞

卷二

鐙景賦

甘肅武威縣知縣張公墓誌銘

與諸暨義軍統領包君書

答南社諸子書

留園詩序

游仙華山記

詒安堂詩三集序

蘭谿留別陳學博序

秋感賦

王觀察誄

感逝吟序

卷三

游鳳鳴山記

重修仙華山昭靈宮碑

暨陽道中與沈學博書

仲泉遺詩序

曼志堂餘集序

退宜堂詩序

與秦勉鉏書

皋社聯吟集序

上徐少宗伯書

外祖沈香崑先生遺詩合鈔序

明處士吳慎直先生畫象贊

卷四

玲清仙館詞序

越郡闡幽丁錄序

仁圖張君畫象贊

讀伏敵堂詩書後

祭浦江令李君文

乞巧文

海運賦

燐火賦

李絳真宰相論

卷五

報孫彥清書

寫觀世音經告文

送譚仲儀之皖序

帶經堂記

送何鏡山之官建州序

與陳藍洲書

與施均父書

歷朝詩錄自序

春游湖上小記

秋舫填詞圖自序

小螺盦病榻憶語序

卷六

皋園修禊序

復見心齋詩集序

漚花小錄序

藏書自記

與友人書

蘭谿訓導陳君誥

皋雲集序

報陶子珍書

杭州重建揚清祠碑

卷七

桐屋遺詩序

報李悉伯書

書煙霞萬古樓文集後

李黼堂中丞三山歸櫂圖序

報孫子九書

陝甘總督相國左公七十壽頌

送門人余遠帆歸新安序

黃烈婦誄

蕩絲詞序

許邁孫重刊靈芬館詞跋

生春詩錄序

卷八

九招

七歎

縵雅堂駢體文卷一

清 山陰王詒壽眉叔著

恭擬皇上龍飛親政頌并序

臣聞大庭膺籙。三辰增玉宇之輝。華殿垂衣。五緯順瑤樞之軌。虞后升壇之日。寶露凝雲。姬王御宇之年。榮光晝水。蓋惟神靈之首出。斯瑞應之呈休。炳炳乎煌煌乎。莫不照耀于紫微。綢繆于青簡者矣。欽惟皇帝陛下。秉德承圖。累仁嗣構。金繩高握。玉鏡重光。溯在降靈誕寶之年。已徵璧合珠連之象。故自龍飛首祚。鳳曆初基。承兩宮皇太后聖善之音。布一代中興之治。十年以來。王政之隆。可敬述焉。夫莫階簪笏。不無凶德之共驢。桐璧冠裳。亦有流言之管蔡。于時顯皇帝宸游翠輦。正慟蒼梧。我皇上誕受元符。乍臨丹扆。豺聲自恣。敢萌跋扈之心。鳳諸頻舉。竟矯絲綸之詔。鼠聖狐神之黨。肘腋生姦。狼貪虎噬之爲。彝倫罔顧。國家多故。中外生疑。遂乃虎衛星嚴。龍驤夜勅。金鈇秋厲。丹劍晨馳。蜮潛何處。雷行木尺之封。獍惡同誅。雨濺藁街之血。九重有慶。萬歲齊呼。此誅姦之政。爲乾綱所首斷也。由是肅槐棘之班。重鹽梅之任。玉珂上相。秉矩心衡志之風。金葉賢王。佐方扈邁軒之治。几杖錫論經之傳。妙簡耆英。節旄授分陝之臣。詎論資序。花蚪紫玉。非無異數之頒。鶴券金書。亦懋勛臣之賞。猶復鸞章屢下。褒及先賢。鴻澤所流。不遺孤節。此崇賢之政。爲今代所獨隆也。且夫狐金鋒毒。元靈開玉璽之經。蠻海氛高。丹浦澤素車之旅。聖世未嘗捐武備。皇古不能無討征。溯自粵氛不靖。旣結連年。彌天逆餓。金狼聯狗國之芒。卷地妖腥。銀鶴走烏

飛之隊。驛騷逾乎半壁。蔓延及于百城。又西北之興戎。共東南而告亂。絳頭走戟。犬羊之衆方張。白帽銜刀。豺虎之羣雜起。國家承平既久。人不知兵。草野流離。海山簸蕩。于是赫然震怒。分命將臣。天戈一麾。陳雲四裂。發羽林之萬騎。用壯兵威。包域外爲一家。兼驅蕃部。驚殘孽。西平入蔡之軍。奪得崑崙。天使張燈之宴。血洗大黃之箭。鏡吹俱騰。頭縣太白之旂。鯨鯢盡戮。百戰百克。迅掃腥煙。南征北征。悉承廟勝。此又武功之震乎四海者也。當鷹武卽戎之日。正螭坳進學之年。天亶聰明。聖惟睿哲。玉龍階靜。時投乙夜之籤。朱雀圖開。兼講庚鈴之策。金峰訪道。何必赤松。琳笈陳經。非惟青纂。及乎天步既安。聖學益懋。銘題寶鏡。藻生奎篆之光。歌禽卿雲。聲合洪鐘之奏。益復布右文之化。推作人之恩。星軺玉尺。先量使者之才。月海珠光。無蔽鏡中之照。麟龍列陛。金箭羅材。彩苞翥鳳。日邊琴瑟之樓。縹帶迴鸞。天上圖書之府。此又文德之冠乎百王者也。他如島夷交臂。刑白馬以輸誠。中使頒恩。憫哀鴻而發粟。屢下求言之詔。宏開納諫之風。金雞放而狂獄常虛。翠羽焚而鹿裘可法。咸皆秉珍珍謨于宸掖。受懿訓于天闈。紫駟循宿。春風奉巡歷之車。素練璇宮。霽月布光輝之德。用能化章坤典。瑞應乾文。運皇極之大鈞。恢帝維之宏軌。今者兩宮皇太后退居長樂。皇帝陛下親總萬幾。九天閭闔。日麗彤雲。百爾衣冠。風清朱序。黃麟瑞野。被聖澤之龐鴻。火鼠窮郊。奉天朝之正朔。星明龍體。值西陵嫫祖之歸。露沐蠶宮。修東館堯門之禮。萬國歸事親之美。普天仰孝治之隆。臣忝列章縫。夙承陶育。恭逢盛典。忻溢徵忱。蒼烏枝上。知帝孝之休徵。黃鵠池邊。識神符之德感。沛新綸于瑤甸。早消玉弩之塵。瞻寶氣于霞衢。敢效金天之頌。謹拜手稽首而獻辭曰。皇矣

上帝鑒在明德。眷命我朝。誕降聖哲。教秉彤宮。化宣丹敕。昔在初基。有紆危國。銀鉞飛霜。金緹馳墨。魁厯授首。不動聲色。鶚惡既消。狐火旋息。威申武帳。義肅嚴律。爰簡忠智。乃升賢良。輔仁導義。警倦戒荒。金樞玉鼎。鶴濟鸞跼。艾綬郁郁。蓮炬煌煌。恩禮所接。侍從亦光。慎爾岳牧。錦節臨疆。九華天語。五雲龍章。溫渥之澤。湛露瀼瀼。厥有封狼。睽陽當路。惟羈惟繫。跳梁騰驚。我武維揚。龍躍虎步。上承廟謨。遠震天怒。蕭斧截萑。洪鑪炳絮。迅儷風發。捷馳露布。秋靜白狼。歌騰朱鷺。寰海鏡清。永沐甘澍。武成既告。文治用垂。丹書早拜。赤誦同師。經橫紫座。講啓玄墀。推論書傳。斟酌蓺辭。帝學日進。雅化風馳。林無雉竄。殿集鳳雛。賦獻赤雁。詩和玉芝。仰承宏德。以鳴盛時。於鑠我皇。憲章琬緯。慈雲所被。慶澤咸萃。大政始親。鉅綱已備。雕氣降霄。珍露呈味。鏡天黃光。幕地紫籟。道昭日月。祥徵休懿。朝野慶流。臣庶忭臆。萬壽無疆。皇風永被。

董嘯巖先生獨石軒遺集序

天神鐵入地。虎氣終騰。特殊淪淵。蟾彩不泯。山陰董嘯巖先生。南湖詩老。陳芳仙人。廿年祕笈。風雨致其邃思。萬里行滕。雲霞涵其殊狀。積玉成圃。擲地有聲。黃鶴一去。秋蜨等散。往者會稽商寶意。太史輯越風。載先生詩僅十餘首。小傳言其全藁已佚。蓋甚惜之也。藪橋參軍。先生之文孫也。祖硯早傳。先澤是寶。傷青箱之莫守。冀錦字之未湮。爰乃走燕雲。歷海嶠。冥搜冷肆。徧訪故家。久之始得舊寫本于閩中某氏。合以舊藏。編成全集。誠芬苑之盛事。騷林之至寶矣。不鄙樸昧。屬弁其首。受而讀之。挾摛華藻。黼黻性情。雖主中晚之一格。實包晉宋之衆製。是故求友之聲婉以摯。託物之言綺以深。行役之什。瑰以麗。據裏之作。

沈以鬱。稽往興感。洋洋乎古音。卽景流唱。落落乎松吹。咀其賡詠。迹彼生平。蓋有學養之功焉。有游歷之助焉。若乃植慧妙年。扇芬青社。擅芳蘭謝生之譽。鄙蛺蝶魏收之狂。論尺讀書。稱銖構藝。蕉葉未展。縑帛亦以寫詩。玫瑰獨笑。童僕知其得句。則二酉集爲少作也。一劒長征。雙輪遠客。折玉河之楊柳。弔金臺之夕陽。白狼秋色。寒到榆關。元鶴西風。夜唳竹廟。客彈長鋏。變酒徒擊筑之聲。馬嚼殘芻。疑古驛催詩之雨。則北行集爲壯游也。及夫殿前獻賦。長樂拜官。望西山而支版。職非馬曹。對翠屏而放衙。訟鮮雀角。觀梅之閣。堆奇書五千卷。粲花之吻。啖荔支三百顆。則作令時有鳴琴集也。蘿袞一視。猿鶴相招。焚魚碧山。抽帆塵海。鹿門有屋。言歸鬱林之裝。陽羨無田。又作荊州之客。山中泉水。淨滌吟心。雲外高樓。橫飛賦筆。則去官後有解組集也。貞曜莫潛。壯心未已。黑水靈關之險。青天蜀道之難。夜雪一鞭。爭行虎熊之徑。秋濤萬疊。倒吹龍蜃之風。青鱷海上。長吟叩舷。紅毛城頭。高唱和角。則入蜀渡臺二集。成于中年也。及夫倦翮還林。歸雲棲岫。石丈無恙。獨坐可以晤言。橘奴猶存。千頭藉之給食。于是讀道德。注南華。參青髓之精。尋玉池之祕。紫房碧宇。所思乃在帝鄉。禪榻藥爐。妙悟生于靜境。則息景學道二集。爲其晚歲所作也。訂卷十二。合篇千餘。青字蟠胸。吐煙雲而萬變。寶氣滿紙。鑄今古爲一家。白太傅之篇章。早見雞林爭購。孔巢父之詩卷。固宜天地長留。然自散佚以來。已逾五紀。假非葢橋搜訪之勤。則亦比之嵇康廣陵之散。竟成絕響。昌谷錦囊之句。終淹溷中耳。玉盧誰守。篆麟不磨。雖曰數存。亦賴後人之賢矣。詒壽感流風之已遠。頗憾遲生。幸白雪之成編。快茲先覩。蓋誠不能已于言云。

秋言自序

壬子之秋。假榻宣州署齋。老屋十笏。青山半牆。雙桐覆庭。苔痕緣城。金甌振厲。脫葉亂飛。渺兮予懷。悲哉秋氣。況乃素屏燭景。涼湍潺潺。清砧三更。明月千里。其或暗雨灑窗。冷枕阻夢。玉河無景。白雁有聲。莫不感動羈客。觸念鄉關。青鏡有流年之悲。碧雲結美人之思。同居之客。秣陵汪子。臨甫會稽胡君。赤城乃相約。舉清尊之局。申養夕之歡。主客迭爲。談諧竝作。雄雌論劍。甲乙品香。齊諸志怪。東坡說鬼。雄雞既號。哈笑未已。亦有慨海宇之多故。念修名之不立。酒薄不醉。卿言始愁。然而苔岑良契。共此流連。桂樹王孫。何傷偃蹇。今夕止談風月。當世自有夔龍。聊以解憂。無關清議。憑臆而發。小言爲多。筆而存之。亦鴻泥之印矣。敬亭十月。梅花欲開。白雲不飛。征舸將發。爰稍排比成卷。書其緣起于簡端。他日者爲風之搏。爲霧之隱。思而不見。天各一涯。酒醒衫寒。燈青漏永。冀展此編。如親語笑也。

沈竹虛亦廬詩序

彎彎流水。花疏竹野之間。宛宛書堂。茶熟香清之候。竹虛先生于是提挈鷗鷺。夷猶琴書。拓雲霞之靈弢。渺松石之幽趣。秋月入戶。滌古研以露華。春聲隔簾。蒼林禽之風遞。長歌塵外。真人天際矣。詒壽與先生忘年訂契。彌日言驢。款松風之關。雙鶴迎屐。酌花閒之酒。一蜚上衣。瑤襟旣諧。瓊笈斯倒。遂出示所箸亦廬詩四卷。臨風一歌。亂墮珠玉。口香三日。如餐茯苓。夫秋士工愁。咸極鬱伊之思。羈旅善感。不無蕉萃之吟。先生少嬰痼疾。長謝纓綬。種桑百株。有田二頃。資身裁給。于世無求。蕭園良書。悅觀于曠旦。長統樂志。

安神乎閨房。天籟自鳴。清商閒發。寫南風之雅操。谿壑迴其春姿。傲北山之白雲。金碧謝其麗績。無託怨悱之旨。獨奏鏘洋之音。飄乎欲僂。淡而彌雋。斯蓋存乎其人。莫得而強也。詒壽以單寒之身。加之牢落。飢來驅我。鬼能笑人。隱南郭之几。叩天而噓。跨東門之馬。愁思忽至。綵雲有日。莫之感。綠水興君子之嗟。詩以言情。歌惟當哭。以視先生之雅抱。冲襟良滋愧矣。芸帙在手。風琴忽聲。刺船海上。期成連之移情。散髮山中。讓孫登以獨嘯。

文學鄺君墓誌銘

君諱文杰。字仙舫。山陰人也。黃扉舊裔。青箱世門。曾祖某。祖某。皆邑諸生。父某。以法家言游大江南北。生君于宿遷。故君又字遷林。石麟之譽。摩頂于導師。家禽之對。流慧于丱歲。年十六。始歸里門。僕以葦末之誼。遂辱壠畔之隨。君闕胷有珠。落唾成玉。張郎詩骨。天遣栽花。昌谷鬼才。句多積錦。跌宕自喜。流連多情。當夫原上草長。隴首雲飛。往往紅衫賭唱。青尊索飲。騎羊入市。人見詫以爲仙。鬪雞聯句。我當避之三舍。不樂爲制舉之文學。使者將案臨。僕數以爲言。始稍稍留意。一篇跳出。便成才子之文。千人軍中。遂樹漢家之幟。補博士弟子員。一應秋試。復屏棄鉛槧。一肆力于詩。又工詞曲。曉風楊柳之吟。秋雨梧桐之唱。播響于筵館。踞席于簾家。至于撫寫丹青。刻畫金石。靈稟所赴。神手自工。才者人所難。年少不廉。是之謂矣。君目無等輩。氣凌滄洲。既不善治生。家日益落。所適又多阻。黃金易盡。青眼莫逢。跳蕩之氣漸摧。身世之感彌軫。步兵縱酒。磊塊難澆。三閭問天。草木皆死。積此孤憤。遂成幽憂。未幾丁父艱。君舉聲一哭。嘔血數

升鶴弔空來。雞骨可把。明年配鄭孺人。又以暴疾亡。傷此嘉耦。思其淑儀。明月虛室。難消騎省之悲。秋雨茂陵。益甚文園之病。以咸豐某年月日。碎于里舍。年僅二十有七。嗚乎哀哉。君所箸有浣蓮室詩詞。及樂府雜曲數種。殘藁畸零。多未寫正。而金鏐已掩。玉樹長埋。楓林之夢不來。廣陵之散將佚。僕也腹痛三步。未忘生平之言。淚滴重泉。空抱人琴之感。蓋滋愧矣。其家將以某年月葬君于某原。爰爲之銘曰。君之度兮翩然。美冠玉兮神仙。君之才兮秀絕。思泮月兮冰雪。嗚乎君兮。既豐于才。何嗇于祿。恨巫咸之下召兮。惜修齡之莫續。將羽衣兮吹笙。駟玉蚪兮紫清。抑海天以長歎。返鸞鶴兮瑤島。埋玉兮沈沈。與君永隔兮傷我心。作銘詞兮貞石。千載不磨兮土蝕莎侵。

擬駱右丞蕩子從軍賦

虜騎憑陵未解圍。迢迢瀚海羽書飛。三時陳氣連烽火。萬里秋風吹鐵衣。鐵衣遠戍幾時旋。蕩子一去年復年。馬蹏踏塞艸。雁景斷胡天。寶劍磨霜冷。雕弓抱月圓。曾持畫戟隨都護。幾逐朱旂掘左賢。戰壘乍看花似血。寒沙又見雪連川。若乃飛狐古塞。黑鵬舊城。犯煙塵而乘障。選驍銳以列營。一軍隘道邊風。勅半夜陰山獵火。明磧裏雁刀凝凍色。雲中鼙鼓動雷聲。大呼先登震山谷。生小幽燕慣馳逐。既突陳而鶻擊。亦紿敵而獐伏。龍驤漢將奏金笳。獸散胡兒帶霜鏃。朔酒香催駱乳紅。燕姬豔擁貂榆綠。蕩子從軍有樂時。空閨倡婦獨含悲。銀泥裙寬蛺蝶帶。鈿雲髻亂芙蓉絲。朧朧寶鏡芳塵暗。滴滴銅壺漏箭遲。鐙何喜而結藥。鵲何事而繞枝。玉關短筵吹楊柳。征人此際應回首。淚洗花顏妾自憐。夢迷榆水君知否。傳來消息